

Was merr su babbeld

Was hosden ewe uffem Speischer gemacht?
Isch habb was gesucht.
Was hosden gesucht?
Ei Fotos vunn de Fassenacht.
Vunn wonn?
Vunn neunzehhunnertfinfunnsibbsisch.
Doo warn merr verrdsisch.
Ja, doo warn merr verrdsisch.
Unn? Hosde die Fotos gefunne?
Naa.
Was sollen druff soi uff dene Fotos?
Ei du unn isch onn Fassenacht im Schitzenhof.
Su Fotos duts nitt gewwe.
Nitt? Es dut doch Fotos vunn uns gewwe.
Awwer nitt vunn de Fassenacht im Schitzenhof.
Nitt? Awwer grad so oons habb isch gesucht.
Wo isch nitt druff bin.
Mett wem bin ischen druff?
Dess waaßt du doch omm bessde.
Ja wennde moonst.
Isch moon nitt, isch waaß dess.
Also host du die Fotos versteggeld.
Isch habbse nitt versteggeld.
Doo gieh isch grad noch emol uff de Speischer.
Dess konnsde derr sparn.
Ei warum donn?
Isch habbse all verrobbd. Schunn vor Johnn.
Verrobbd? Die scheene Fotos vunn mir unn ...
Unn wem?
Vunn mir unn dir. Odder?
Su Fotos hädd isch nitt verrobbd.
Verrobbd! Wer verrobbd donn Fotos?
Isch. Weil die hawwe merr noch nie gefalle.
Unn warum nitt?
Weil isch nitt druff gewese bin.
Werklich nitt?
Naa, wenn ischs doch saach.
Awwer grad jetz hädd isch oons gebrauchd.
Unn warum?
Isch habb onn de Tonkstell oo getroffe.
Wen hosde getroffe?
Isch waaß nimmi wie die heeßt.
Unn e Foto mett dir unn dere hosde gesucht?
Ja, weil misch die Fraa droo erinnert hott.
Onn was?

Onn die Fassenacht vor bald verrdsisch Johr.
Aha. Donn hosde die Friederike getroffe.
Ja rischdisch, su heeßt se unn wohnt in Bonn.
Mett dere hosde doomols die Mott gemacht.
Ja, awwer nor onn Fassenacht.
Hoddse was vumm Oskar verzählt?
Wer issen dess?
De Oskar iss dere ihrn Monn.
Wieso waaßden dess alles heit noch su genau?
Was donn?
Ei dess mett de Friederike unn ihrm Monn?
Weil de Oskar doomols moin Fassenachtsstern war.

Eiern Honnes